



28. Aprili 2026

UPA2026/27

**Uunga siunnersuut: Unammilleqatigiinneq pillugu Inatsisartut Inatsisaata allanngortinnissaa pillugu Inatsisartut Inatsisaat**

(Niuertarfinnik paasiniaaneq, immikkoortortamik misissuinerit, Unammilleqatigiinnermut Ataatsimiititaliap toqqaanera, taasinerimut maleruagassat ingerlasinnaassuserlu, suliffeqarfiup paasissutissanik imminermut tunngasunik takunnissinnaassusaa, killigititamik unitsitsineq il.il.)

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalackersuisoq)

Naalackersuisut unammilleqatigiinneq pillugu inatsisip allannguutissatut siunnersuummik saqqummiussinerannut Siumup qutsavigai. Unammilleqatigiinnerup nukittorsarneqarnissaa aammalu atuisut pitsaanerumik atugassaqaarnissaat pingaaruteqarput, tamannalu Siumumit taperparput. Kisianni taamaattumik aamma akisussaaffigaarput apeqqutit pingaarutillit matumuuna saqqummiutissallugit.

Siullertut apeqqutigisariaqarparput siunnersuut una nunatsinni immikkut pissutsinut naleqqussagaanersoq. Nunarput niuerfiuvoq mikisoq, niuertut ikittuupput, nuna isorartoorujussuuvoq aammalu unammilleqatigiinnermut periarfissat killegarput, taamaattumillu malittarisassiineq immikkut eqqarsaatigineqartariaqarpoq.

Siunnersuummi matumani Atuisunut Unammilleqatigiinnermullu Aqutsisoqarfik annertoorujussuarmik pisinnaatitaaffilerneqarpoq. Taamaattumik apeqqut tunngavisoq tassaavoq: pisariaqartinneqarpa taamatut annertutigisumik pisinnaatitaaffiliineq? Aarlerinangila oqartussat inuussutissarsiornermullu akornanni oqimaaqatigiinneq allanngortinneqassasoq?

Taamatutaaq apeqqutigineqartariaqarpoq Unammilleqatigiinnermut Ataatsimiititaliap inissisimanera siunissami qanoq issanersoq. Aqutsisoqarfik misissuisinnaappat, nalilersuisinnaappat aammalu iliuuseqarsinnaappat, taava ataatsimiititaliap inissisimanera sunaassava? Aarlerinangila taanna annikillisinneqarnissaa imaluunniit pingaaruteqannginnerulersinneqarnissaa?

Pingaartumik ernumanartoq tassaavoq niuerfinni misissuisinnaaneq pillugu siunnersuut, tasanilu oqartussat inatsimmik unioqquitsisoqarsimangikkaluarpalluunniit iliuuseqarsinnaapput. Tamanna annertoorujussuarmik alloriarneruvoq. Taamaattumik apeqqutigisariaqarparput: oqartussat killissaasa sumiinnerat, suliffeqarfiit inatsisitigut illersorneqarnissaat qanoq qulakkeerneqassanersoq aammalu qanoq ililluni aalajangiinerit assigiinnissat qulakkeerneqarsinnaanersut.

Aamma annertuumik ernumanartuuvoq misissuinerimut tunngasunik pisinnaatitaaffiit. Siumumiit erseqqissumik oqaatigerusuppara: misissuineq politiit suliassarivaat. Politiit ilinniagaqarsimapput, pisinnaasaqarput aammalu inatsisitigut tunngavissaqarlutik taamatut suliaqarnissamut. Taamaattumik apeqqutigissavarput: sooq aqutsisoqarfik taamatut pisinnaatitaaffilerneqassava? Qanoq suliffeqarfiit



inatsisitigut illersorneqarnissaat qulakkeerneqassava? Qanoq oqartussat akornanni akisussaaffiit assigiinngitsut akulerunneqannginnissaat qulakkeerneqassava?

Siumut matumani erseqqissarusuppaa tunngaviusumik pingaarutilik: nunarput inatsisitigut illersugaanermik tunngaveqartumik ingerlasuuvoq. Oqartussat atuuffii ersarissumik killilersugaasariaqarput, naapertuutinneqartariaqarput aammalu innuttaasut suliffeqarfiillu inatsisitigut illersorneqarnissaat qulakkeerneqartariaqarpoq.

Naalakkersuisut aningaasatigut kingunerisassat pillugit naliliinerat Siumup aamma isumaqatiginngilaa. Allassimavoq allannguutit aqutsisoqarfiup nammineq aningaasatigut sinaakkutaasa iluani naammassineqarsinnaasut, tamanna Siumumit upperiuminaatsinneqarpoq. Nutaanik suleriaatsinik pilersitsisoqassappat, sulisunut nutaanik piginnaasanik pisariaqartitsisoqassappat, ilaatigut politiitut ittunik, aammalu allaffissornikkut suliassat annertusineqassappata, taava qanoq ililluni tamanna pisinnaava aningaasatigut amerlanerusunik pisariaqartitsinngitsumik? Naalakkersuisummi nalilerpaat tamanna pisinnaasoq allatigut suliassat sanngiillisinngikkaluarlugit? Imaluunniit aarlerinangila aningaasatigut kingunerisassat kingorna saqqummerumaartut?

Naggataatigut oqaatigissavara Siumut unammilleqatigiinnerup nukittorsarneqarnissaa tapersermagu, kisianni ernumassuteqarluni siunnersuut una annertuvallaartumik nakkutilliinermik annertusisitsisoq, inatsisitigut illersorneqarnissamut, ersarissumik atugassaqartitsinermut aammalu inuussutissarsiornermut akornutaasinnaasoq. Taamaattumik siunnersuutip maannakkut ilusimisut iluseqartup Siumumit tapersersorneqarsinnaangilaq.

Kisianni Siumut isumaqarpoq apeqqutit pingaarutillit sukumiisumik oqallisigineqarnissaat pisariaqartoq, taamaattumillu siunnersuut innersuussutigineqarpoq inuussutissarsiornermut ataatsimiititaliamut aappassaaneerneqannginnerani suliassanngortinneqassasoq.

Lars Poulsen, Siumut